

四庫全書

子部

欽定四庫全書

子部

古今事文類聚遺集卷一

詳校官中書臣沈颺

侍讀臣孫球覆勘

總校官編修臣王燕緒

校對官中書臣王家賓

謄錄監生臣朱連傑

欽定四庫全書

古今事文類聚遺集卷一

元 富大用 撰

三師部遺

三少

此下補新集三公之後

歷代公輩周曰三孤

通典曰孤特也言卑於公尊於卿特置此三人

秦漢而下

省後周置三孤以貳三公

職源

宋沿唐制置三師以太

尉司徒司空為三公元豐肇新官制於三師三公無

所改政和二年詔司徒司空周六卿之官非三公之任乃今之六曹尚書是也太尉秦官居主兵之任亦非三公太尉司徒司空並罷依周制立三孤之官乃次輔之任或稱三少為次相之任元廢

通典續會要

羣書要語少師少傅少保曰三孤貳公弘化寅亮天地

弼予一人

書周官

孤乘夏篆

周禮

以三少孤卿與九卿為九

馬

通典

三公立三少為之副少師少傅少保是為孤卿

前百

官公卿表

篆車希冕視秩於貳公

歲表類

古今事實

輔一人治

副貳三公弘大道化敬信天地之教以輔我一人之治

周官注

聽獄棘下

成獄辭大司寇聽之於棘木之下注左九棘孤卿位焉

記王制

公孤四命

公之孤四命以皮帛眡小國之君注九命上公得置孤

一人

禮春官典命

孤卿特揖

司士正朝儀之位孤卿特揖注特揖一一揖之

禮夏官

孤東面

射人掌國之三公孤卿之位孤東面

夏官

東面北上

朝儀之位王南鄉三公北面東上孤東面北上

禮司士

張幕設案

孤卿有邦事則張幕設案

天官

孤乘夏篆

服車五乘孤乘夏篆卿乘夏縵注謂夏篆五采畫轂約

也

春官

孤服希冕

孤之服自希冕而下注雜記曰大夫爵弁自祭享於廟

惟孤爾

春官司服

孤執皮帛

大宗伯以禽作六摯以等諸臣孤執皮帛注皮帛者束帛而表以皮為之飾虎豹皮帛如今碧色繒也天子之

孤卿摯以虎皮公之孤摯以豹皮

春官

三耦射一侯

孤卿以三耦射一侯一獲一容樂以采蘋五節二正

禮射

人

通寒暑

晉職官志九卿通寒暑

位九棘

朝士掌建邦外朝之法左九棘孤卿位焉羣士在其後
注植棘以為位者取其赤心而外刺

副公論道

孤王之孤三人副三公論道者

次輔之位

依周制立三孤之官乃次輔之位或稱三少為次相之

位

少師

羣書要語微子若曰父師少師殷其弗或亂正四方書微

子極貳公之位欵

政和除童貫制

俾陟亞師之列

初蔡楊戡制

視秩

亞師

藍從熙制

入乘夏篆視三公絕等之崇

古今事實

問於少師

問於大師少師注曰少師孤卿比干也

少師之責

天子燕業反其學左右之習詭其師答諸侯遇大臣不知大雅之辭已語之道簡聞小誦不博習此少師之責也

以節度除

紹興九年節度使韓世忠除少師十年少傅節度使張俊除少師二十八年少傅節度使楊存中除少師孝宗即位九月少傅四川宣撫使吳玠除少師

罷僕射授

隆興二年除授特進尚書右僕射兼樞密使張浚可罷
右僕射特進少師保信軍節度使判福州以浚自劾求
去故也

古今文集

雜著

覃恩辭免轉少師表

周必大

臣某言近具奏辭免覃恩除臣少師恩命伏蒙聖慈特

降詔書不允者作君師而相上帝幸際龍飛亮天地而
弼一人收叨鴻需曲煩溫詔增震危衷臣某

謝中

臣聞氣

回天而萬物生邦有慶而兆民賴惠澤固周於溥率等
差宜別於重輕若輔佐居中捧東日於天衢之上或親
賢在列拱北辰於霄極之間以此疇庸是云馭貴如臣
者身藏猷畝景薄崦嵫掛神武之冠方將有請揚王庭
之號豈所常然夫何特揖之官亦在序陞之數懼貽清
議祇控丹誠伏望皇帝陛下勉勵人材操持公器雖推

恩不可以不廣而詔爵不可以不嚴已彰均一之仁盡
寢優隆之命大辭如慢非希難進之風小智自私姑道
貪夫之誚臣無任

云云

少傅

羣書要語少傅為孤卿

百官表

元袞赤舄進次傅之崇名

政和除錢景臻制

越陞亞傅之班

古今事實

少傅之責

天子居處出入不以禮衣服冠帶不以制御器列側不以度采服從好不以章忿悅不以義與奪不以節此少傅之責也

大戴禮

張良畫計

漢高祖欲易太子張良為太子畫計曰上所不能致者四人今誠能卑辭厚禮請以為客時從入朝亦一助也及黥布反良說上以太子監關中兵上謂子房雖疾彊起傅太子以良行少傅事及破布歸上愈欲易太子及

宴置酒太子侍四人者從上怪問之四人各言姓名帝大驚曰煩公卒調護太子太子竟不易者皆良招四皓

力也

本傳

自少保除

紹興六年少保節度使張浚除少傅七年少保節度使楊存中除少傅三十一年少保四川宣撫使吳玠除少傅

奏事特授

紹興三十二年孝宗即位張浚特授少傅進封魏國公
浚以樞密使都督江淮軍馬入朝奏事繼有是命

古今文集

雜著

謝復少傅表

周必大

閱呂刑之實周典素輕還疏傳之官漢恩彌重丹書洗

滌皓首兢榮臣某

謝中

伏念臣坎凜孤蹤摧頽暮景冒寵

光而最久積罪戾以殊深比致煩言分甘嚴譴獨賴神

聖之眷許存孤保之官僅閱再期未經三宥駭新綸之
驟下恍舊秩之負來茲蓋伏遇皇帝陛下徧覆無殊容
光必照刑非樂用汝自速辜恩弗遐遺予無作好誕布
發生之德俯知老退之臣大誠薄懲昔忝小人之福初
迷後順今希君子之行惟誓靡捐以圖報稱臣無任

少保

羣書要語少保為孤卿

百官表

峻陞亞保位孤棘於外朝

初寮除
余深制

眷子孤保

除鄧昭
武制

古今事實

少保之責

天子居處燕私安而易樂而耽飲食不時醉飽不節寢起早晏無常玩好器美無制此少保之責也

大戴禮

未嘗輕授

紹興元年少保左僕射呂頤浩罷少保除特進先是頤浩言少保之官自陛下臨御未嘗輕授望追寢成命除一階官故有是詔至七年三月自鎮南軍節度使開府

儀同三司充浙西安撫制置大使兼知臨安府始除少

保會
要

求去特授

乾道八年九月左丞相華國公虞允文特授少保武安
軍節度使充四川宣撫使進封雍國公以求去故也

左僕射授

隆興元年十二月左僕射授信國公陳康伯特授少保
大觀文進封福國公判信州

節度使除

紹興五年武成威德軍節度使開府儀同三司充鎮江
建康淮東宣撫使韓世忠除少保紹興六年兩鎮使相
江東宣撫使張浚除少保紹興九年六月武勝定國軍
節度使岳飛除少保紹興十二年保成軍節度使開府
楊全忠除少保紹興二十九年奉國軍節度使判興州
吳璘除少保

古今文集

雜著

辭免少保劄子

周必大

殊私曲被駭汗交流臣聞賞當其功謂之慶授非其人
謂之僭適者壽皇聖帝親以大寶傳授聖明當行慶施
惠之初夷夏傾耳以聽號令臣於斯時誤尸宰事所宜
協贊陛下愛惜名器脩明紀綱豈容身自僥踰或愆於
義伏况孤保之任專待勲德前後輔臣得此者鮮而乃
首揚大庭之號加臣非分之寵本欲行慶反近僭賞其

為初政之累也大矣臣今未敢奉行制命蓋將必冀寢
免若溥博之恩徧及臣庶不使微臣獨未霑被則臣固
嘗面奏乞許回授私心公論庶皆合宜伏望聖慈特賜
矜允干犯天威臣無任兢惶懇切之至

再辭免少保劄子

周必大

臣猥以凡才久事陛下於東宮今值君臨萬邦又得備
位宰輔其為榮幸殆非衆比覃沛所加臣何敢固辭惟
是三孤重任與尋常遷轉不同非親非賢非有大功未

始輕畀臣實何人乃敢當此若謂恩絲近始理難獨遺
臣固已屢奏乞許回授儻蒙陛下曲從所請則是國之
大慶非不霑被而況制命告廷人皆知陛下待臣禮意
甚寵今者自緣揣分量才再三控避陛下不得已而聽
之在臣居之則安於國又免僭賞其為大賜奚啻一官
而已臣已再上表陳免謹具劄子申敘懇款必冀天慈
即賜俞允臣無任惶懼俟命之至

辭免少保表

周必大

該輔無功際九五御天之始疏榮有命居二三執政之

先方備控於枕詞已隨頒於溫詔明知踰分敢避瀆尊

臣某

中謝

臣竊惟左棘之聯時乃面槐之貳周官立訓資

兩儀寅亮之功漢志垂謨任萬乘燕私之責歷代久忘

於古誼政和初定於宏規必酬勲德之隆或待親賢之

茂上匪虛授下難冒居如臣者稟資迂愚遭世休顯大

言則望大利每愧事君小材不離小官自甘累日詎期

頻歲連陟崇階會逢離照之明更下巽申之命式是百

辟久不稱於儀圖茲惟三孤顧豈容於官備伏望皇帝
陛下道無私覆明以公生謹旌褒者當在政初抑僥倖
者必繇貴始特回誤寵姑許貶恩既免累于清朝亦獲
安於素守臣無任

再辭免少保表

周必大

烟幅之言踵詔音而上瀆丁寧之訓勤敕使以來宣凜
危慮之未安控堅辭而弗已臣某中謝臣竊以龍飛之慶
溥及華夷蠢動之微咸霑雨露幸叨居於輔佐例覃被

於光榮償大義之罔愆在小廉而可畧惟今亞保乃昔
司空有德者不必真除況臣無弼諧之德有勞者未嘗
序進況臣無翊戴之勞直緣會遇於一時遂假寵靈於
三少自猶知其弗稱人豈謂之當然蓋取非其分則灾
身而與過其宜則累國是敢懇懇前旒之側且將忉忉
累牘之中期逭滿盈少逃譴負何上紆於宸眷復申戒
於汝諧施重丘山懼深淵谷伏望皇帝陛下持爵馭其
臣之要稽賞延於世之大許以貴名貶之賤息如是則

恩從隗始已毋廢於舊章民其尹瞻亦免于於新政臣之
幸也天必從之臣無任

謝除少保表

周必大

天開禹績親承歷數之傳德愧尹躬叨被保衡之拜控
辭弗獲祇受為慙臣某

中謝

臣惟祖宗之盛時多卿相之

舊德勲業光于簡冊聲名重於朝廷正唯爵位之高允
謂事功之稱如臣不肖敢企前修曾微一善之稱偶際
三朝之盛麟臺憲府蚤蒙高廟之親除螭陛綸闈嘗侍

壽皇之初政晚備中台之數再逢內禪之期首告大庭
超加異渥念覃霑自近司而始稽舊章無回授之文跼
躋拜嘉忭就列茲蓋伏遇皇帝陛下乾飛有作離照
無疆憐臣昔謫宮僚久承恩獎謂臣今居宰席密佐聖
明特厚寵華式昭榮遇統百官而均四海已知任職之
難曰三孤而弼一人當究多官之義未知報塞徒誓靡
捐臣無任

檢校官

歷代沿革檢校本加官自唐以來有之凡內職崇班今修

武郎武臣副率以上初除及該恩皆帶若文臣則樞密

宣徽節度使始帶焉自三公謂太尉司徒司空三師僕射尚

書僕射尚書常侍至賓客祭酒凡十餘等元豐官制

武臣承宣使已下皆罷惟存檢校三公三師以待節

度使之久次者政和後改三公為三少若武臣累加

至檢校少師則拜太尉大臣累加至檢校少師則拜

開府儀同三司安南國王初襲封加檢校太尉經恩

加檢校太師諸蕃刺史州則檢校太子賓客此外皆

不帶云

朝野雜記

羣書要語仍益校聯之美悉欽朝賞之華

胡文恭除范全檢校制

聯三階於宰路

除留正檢校少保制

古今事實

元豐皆罷

唐有檢校官國朝之制檢校官一十九三公三師六左僕射至水部郎共十三元豐官制行左僕射以下皆為

職事官故罷之凡三師三公除授自司徒遷太保太保
遷太傅太傅遷太尉太尉遷太師檢校官亦如之

續會要

政和後置

政和二年罷太尉司徒司空以少師少傅少保為三少
後亦置檢校官紹興七年士裏檢校少師錢忱檢校少

保

同上

古今文集

雜著

論建節加檢校

朱元晦

三公三孤以師道輔佐天子後世官職益紊今遂以三公三孤之官如階官貼職之類不復有師保之任論道經邦之責矣舊來猶是大臣之有勲德重望者方得除此以其有輔教天子之名故也後世或以諸王子或以武臣為之既是天子之子與武臣豈可任師保之責耶訛謬承襲不復釐正祖宗之法除三孤三公者必須建節加檢校太子少保少師之類然後除開府儀同三司

既除開府然後除三孤三公南渡以來如張韓劉岳諸武臣猶是如此外皆不帶今則不然既建節便抹過檢校徑除開府至三孤三公矣

晦菴語錄

樞密院部遺

宰相兼樞使

此下補新集樞密院之後

古今事實

唐始帶印

樞密使帶相印為樞相自後唐始

國朝會要

國初始兼

國初魏仁浦以宰相兼樞密使後罷

會要

宰相兼判

慶歷二年二邊用兵富文忠公言邊事係國安危國初范質王溥以宰相兼叅知樞密事今兵興宜令宰相兼領仁宗然之令中書同議樞密院事呂許公時為首相以內降納上前曰恐樞密院謂臣奪權時諫官亦論宰相宜知兵事遂降制以宰相兼樞密或曰二府體均判

字太重於是復改為兼樞密使

揮塵錄

建炎復兼

建炎四年以宰相范宗尹無知樞密院罷御營以其事歸樞密院機速房自慶歷後宰相不兼樞密者八十餘年其復兼自此始紹興七年命宰臣張浚兼樞密使趙鼎秦檜亦以左右僕射兼

中興會要

紹興中罷

紹興二十五年檜明年詔曰比緣軍興令宰臣兼樞

密使典掌機務今邊事已定可依祖宗故事更不兼領

二十六年五月罷兼樞密院

同上

史浩論兼

紹興三十二年孝宗即位叅政史浩論樞密合使宰相兼使事因引富弼對仁宗故事上曰正合朕見詔宰臣

依舊兼樞密使

孝宗會要

議密院事

慶歷二年上曰樞密非古官未欲遽改正令中書同議

密院事

數建利害

仁宗親政拜晏殊樞密使加同平章事自殊復召用而趙元昊反師出陝西天下繫於兵殊數建利害請罷監軍兼以陣圖示諸將使得應敵為攻守及制財用為出入之要皆有法仁宗悉施行之

晏殊傳

古今文集

雜著

乞令宰相兼樞密使劄子 周必大

臣伏見仁宗皇帝慶歷二年秋晏殊為樞密使王貽永副之會西邊出師用諫官富弼之言詔宰相呂夷簡章得象並兼樞密使今北方情偽罔測正陛下經武整軍之時比之西邊事體尤重兼中興以後自有近例欲望聖明稽叅故實命王淮梁克家兼總樞務既合公論亦叶權宜臣累月來屢與施師點商量方敢奏稟如蒙允許自當悉心竭力叶贊萬一決不敢懷安避事仰辜任

使取進止

古詩

慶歷聖德詩

石介

惟仲淹弼一夔一契天實賚予予其敢忽曰衍汝來汝
予黃髮遂長樞府兵政無蹶予早識琦琦有奇骨可屬
大事重厚如勃

知樞密院

歷代沿革晉天福初桑維翰以翰林學士尚書禮部侍

郎知樞密院事知院之名始此

分紀

宋初不置淳化

二年樞使王顯出鎮始以張遜知樞密院事

續會要

知

樞密院同知院並正二品知院掌佐天子執兵政而

同知院為之副凡邊防軍務常與三省分班稟奏事

干體要則宰相執政官合奏

神宗正史職官志

元豐官制行

廢樞使政和末鄧莘公官至少保猶止為知院焉初

宰相兼樞密只兼知院

羣書要語樞使知院典機務掌兵政出納密命以佐邦

治

續會要

知院掌佐天子執兵政而同知為之貳

同上宜總

鴻樞

溫公集

丹地廻翔便總萬機之任

古今事實

專掌兵籍

李綱除知樞密院奏云祖宗之法樞密院事掌兵籍虎符三衙管軍諸路帥臣主兵柄各有分守所以維持軍政萬世不易之法也

被命鴻樞

李綱以右丞被命樞筦奏云伏蒙聖恩除知樞密院事
以被命鴻樞專統兵機宜得魁奇英偉之人以居其任

周知世務

李諮字仲詢謚憲成為知樞密院事資性明達周知世
務處劇若閒暇在樞府抑僥倖號為稱職

古今文集

雜著

辭免知樞密院事劄子

周必大

臣聞命震惶罔知所措臣竊以西樞分職兵柄在焉本
朝雖委用儒臣亦須有文武才略識華戎事體且望實
素為中外所信服者然後舉而用之乃能仰副注倚俯
協公議如臣不肖論迂而性拙徒以章句之學久被簡
知服在論思已為忝冒驟叅機政彌愧超踰敢意誤恩
進籌帷幄雖陛下聖謨獨運神武布昭執事之臣不過
稟訓飭於上行文書於下縱殫薄技難企清光然而官
匪其人國家奚賴才不稱位有衆何觀祇竭忱誠仰祈

鴻造冀回渙渥改授英才俾仍舊班免貽非據之誚其
為榮幸殆與進擢均矣

辭免知樞密院事表

周必大

左轄瘝官宜首加於幽黜右樞分職敢遽冒於顯除雖
尺一之頒理不可違然再三之瀆誠亦難已臣某

中臣謝

竊以本兵地要率屬選高觀累朝之求賢暨明主之籲
俊或取其久更帥開遂圖任而勿疑或為其賞貳幾廷
越進遷而示寵故望以徊翔而加重智因練歷而愈明

試可若斯僉諧必矣惟臣之慙無一而宜所窺者率皆古昔之陳篇所供者不過簿書之當守心豈識軍戎之要足未趨宥密之嚴方二柄之昉分乃一朝而躡進聖神在上若為叅前箸之籌哲艾滿朝徒使愧後薪之積苟不力祈於避免殆將立抵于譴呵伏望皇帝陛下以稽古之聰明鑒用人之得失收還誤渥改授實能天祐高皇必有子房之決勝人歸宣后寧無吉甫之憲邦罔俾愚臣或妨賢路

謝知樞密院事表

周必大

獨化陶鈞之上天啓聖謨折衝樽俎之間人需賢德孰
云庸懦堪此選除望帷幄以彷徨拜絲綸而慄慄臣某
謝中臣聞兵布于外是為爪牙權歸于中實寄心腹上下

有相維之勢古今存不易之規廟勝所關才難為甚如
臣者駑駘步窘培塿形卑初非致遠之才敢起升高之
念而遭逢華旦忝竊殊知三載神畿漏歷清華之地十
年禁索遂參輔拂之聯戴恩奚啻於丘山論報未施于

涓滴所期汰免何意褒遷越錄黃閣之嚴陞踐紫樞之峻惟乃聖乃神之真主方高出於百王豈不文不武之具臣可迭居於二府懇辭弗獲祇受為慙茲蓋伏遇皇帝陛下政急內脩策先自治宅中圖大既隆道德之威詰禁制軍不廢甲兵之問姑緣人乏猥用臣愚臣敢不激勵壯心贊襄先務外攘邊徼願觀復古之勲載戢干戈尚覲垂衣之化

同知樞密院

歷代沿革五代有叅知樞密院事

詳見樞密院

宋初闕淳化

二年王顯出鎮張遜知樞密院事始以溫仲舒寇準

同知院同知之名自此始也

會要

元豐官制行廢使副

存同知

職源

紹興中高宗以本兵之地事權宜重依祖

宗故事置樞密使而知院同知院亦仍舊由是竝除

羣書要語任峻樞衡

楊文公集

叅司樞務

同上

協宣機政

六一集

預議樞衡

蘇魏公集

自聯基宥屢告謀猷

同上

叅筦樞衡

曲阜集

丹地鴻樞亦預聞於政事

賡表類

贊一人之休必資耆德

握萬兵之本爰賴舊臣蓋知其務者可以應務而不窮
久於事者可以臨機而無惑宜煩故老就翊洪樞

古今事實

王范叅知

周顯德六年命司徒平章范質禮部尚書王溥並叅知

樞密院

五代史

專主謀議

向文簡公敏中同知樞密院明辨有才略處事敏速樞

機之任專主謀議時西北用兵至於二邊道路斥候走集之所莫不周知

托腹心寄

呂公著復同知樞密院事神宗手詔曰顧在廷之人有可以托中外腹心之寄均皇家休戚之重無逾卿者可亟起視事

收之桑榆

呂公著拜同知樞密院事公著謝因奏曰臣老於閫外

蒙陛下收之桑榆唯知拳拳納忠以報恩遇

起自員外

向敏中自員外郎為諫議知樞密院止百餘日

權衡人才

命端明殿學士呂公著好士出於天性士大夫有以人
物為意者必問其所知所聞叅覈以待上求上嘗謂輔
臣曰公著之於人材其言不欺如權衡之於稱物焉

筆識諸將

劉忠肅公珙字共父乾道三年擢同知樞密院公以本
兵柄於諸將之能否不可以不周知乃自諸管軍統領
官下至裨將佐日召三四人與語得其材用所宜輒筆
識之以待選用

論用宗室

趙丞相汝愚始除同知院力辭引高宗聖訓宗室用至
侍從即止之語壽皇召學士荅詔諭以紹興聖訓用折
秦檜陰謀蓋有為而言也

問為治要

張忠定公燾字子公孝宗受禪召除同知樞密院事問
為治之要公言內治乃可以外攘願詔百執事赴都省
給札條具上大喜於是士夫欲言不能自達者纖悉聞矣

修時政記

樞密院時政記編脩官刪潤同知院事脩

古今文集

雜著

辭免同知樞密院劄子

樓鑰

誤恩狎至小已增慙伏念臣頃備論思久投閒散倚皇
明之收召加寵渥以便蕃裨叅樞筦之班仍預儲局之
客已為過幸每懼弗堪曾暖席之未遑俄歷階而使進
本兵至重寧容濫吹之人偃伯云初茲豈養病之地尚
淺一毫之效遂叨二府之真念朝行之髦士甚多況天
下之逸民未舉不應邇列乃以序遷欲望皇帝陛下俯
鑒由衷世嫌反汗遴選英才而圖任姑令舊署之少安

亟賜俞音免貽羣議

辭免同知樞密院事表

樓鑰

宥府選寮忽叨再命需章避寵尚閔一俞爰游瀆於宸
聰冀終回於渙渥臣某

謝中

伏念臣引經納祿奉詔還朝

始膺典選之除適與和戎之議既不能出奇策以強國
勢又不能抗高論以竊時名深惟世務之宜遂定從官
之論鄰盟既講邊備粗寬魏絳何功姑欲就威懷之得
利張昭雖老當使知將相之有人賴聖慈俯徇於和親

在臣下盍為之引咎自愧寡謀之甚難陪基命之司殆
無地以寄顏惟竭誠而報主日圖內治之要未知所先
靡厭衆言之求尚不暇給有何勞効遽被推遷不勝據
疾之憂徒謹循牆之走伏望皇帝陛下俯垂淵鑒洞察
愚忠豈惟微臣懷以榮為懼之恐仰祈睿筭篤居安慮
危之心精求文武之才用贊樞機之任

謝同知樞密院事表

樓鑰

筵宥密之班未知圖報拜便蕃之渥弗許終辭自揆僥

逾實深感惕臣某

中謝

竊以皇家嚴二府之建任固匪輕

機庭分四等之差官卽求備賢相拉兼於使領副樞實
贊於事幾既曰才難豈容序進伏念臣少無可用老尚
何堪扶病以對便朝幸不違於咫尺彊顏而居舊署顧
奚補於毫分假寵以多丐聞未得敢謂七旬之後冒叅
兩地之榮畀興國熙載之官已為過分加淳化寇準之
職尤愧無名偶緣廷告之同時因與政途而接踵在法
當從既超筆索之聯計日而言僅周天地之數併增采

食洊被匪頒茲蓋伏遇皇帝陛下茂建大中丕乘興運
謂股肱所寄方彙進於時髦雖筋力既衰亦使陪于末
議未遑席暖復俾階升臣敢不仰戴隆私益堅素守邊
陲甫定願裨內治之謀里社相望期遂歸休之請

檢詳

歷代沿革檢詳之職古無之宋熙寧四年詔以編修經
武要略官四人王存陳侂陳奉世蘇波檢詳樞密院
諸房文字禮遇視中書檢正官元豐三年詔定置三

員及改官制檢詳官尋罷續會要建炎三年樞密院請

依祖宗朝置檢詳諸房文字兩員敘位在左右司之

下紹興二年詔樞密院已置都承旨一員減檢詳一

員樞密請置二員從之中興會要三十二年詔樞密院諸

房令檢詳書擬從左右司請也乾道二年詔樞密院

檢詳係掌朝廷機要文字不許出謁及接見賓客亦

令遵兩省官施行

古今事實

擢置樞掾

熙寧五年詔檢詳大字劉安世自擢置樞掾奉職不苟
可除集賢校理

右府設屬

神宗朝除范育檢詳大字制曰右府典領樞機而設屬
于下以覈其事

言養兵法

呂大忠檢詳樞密院吏兵房大字令條義勇利害大忠

言養兵猥衆國用日屈漢之屯田唐之府兵善法也弓箭手近於屯田義勇近於府兵擇用一焉兵屯可省矣

東都
事畧

右選歸心

陳居仁字安行樞屬闕員方以著廷名進擬上曰陳居仁今為何官對曰為郎上曰豈有人材如居仁而可久為郎者乎即除樞密院檢詳文字二府不受私謁差遣恩例悉令投牒送檢詳所公為之考令申酌故實可否

立決右選翕然歸心

樓攻媿集

密謀誅叛

劉子羽樞密院檢詳文字張魏公同知樞密范瓊來赴行在張奏瓊大逆不道獨與子羽密謀夜召子羽及選密院謹飭吏數人謀作大劄榜皆備鎖吏于府中翼早公赴都堂召瓊議事瓊從兵隘塗巷意象自若坐定子羽亟取寫勅黃紙詣前揖瓊下曰有敕將軍宜下大理置對命縛瓊送大理寺子羽已張榜于省門親以肯綮

瓊衆頓刃應諾瓊論死兵分隸神武軍

晦庵文集

令撰詔檄

紹興三十一年完顏亮叛盟時洪文敏公邁任樞密院

檢詳宰相傳旨令撰書詔榜檄

家傳

編脩官

歷代沿革編脩官之職古無之宋慶歷四年史館王洙

承旨單士寧編脩例冊編脩之名自此始

分紀

熙寧三

年以館職王存顧臨等同編經武要略兼刪定諸房

例冊元祐四年詔密院條例久未編脩又自官制後
舊事隸他司所存者亦未刪正命承旨司取索編脩
以奉議郎蔡駟宣德郎衛規充編脩官續會要舊以四
員為額紹興兵興裁省其半三年樞密請置檢詳二
員編脩止存一員後復中興會要編脩官隨事置無定員
以本院官兼者不入銜

羣書要語爾以編削之才遊樞機之府

龍溪除張顥制

古今事實

經武要略

熙寧二年樞密院乞將祖宗以來法制所宜施行於久
遠者並與刪取大旨著為畫一及聖政釐革條章檢尋
本院文書以次紀錄其事目曰兵制凡招揀屯戍訓練
之類皆附焉曰馬政曰邊防曰邊郵曰屬國曰守城曰
器械曰捕盜曰選材曰責效各以其事類相從一如兵
制候編成策仍於逐門各留空紙以備書載將來處置
事件從之詔以經武要略為名

會要

編錄條例

熙寧九年宣徽北院使王拱辰言本院前後降宣劄條例文字及逐旋聖旨指揮不可遺墜乞行編錄所貴朝廷故事永久可備檢用從之六月拱辰辟著作郎何詢直充編脩官就本院置局十年八月編成條例并目二十五策上之十二月罷局詢直減二年磨勘

刪潤條法

紹興三年樞密院言本院雖有編脩官四員止是刪潤

條法又裁省其半

中興會要

刪定時政

孝宗朝編脩官張淵言樞密院時政記本本院諸房應降聖旨按月作時政記編脩官刪定近蒙朝廷止作錄送付下乞今後刪定記止據憑錄送到文字依舊按月修進從之

孝宗會要

刪定例冊

熙寧三年命著作佐郎館閣校勘王存陳侂大理寺丞

館閣校勘顧臨並差編脩樞密院經武要略刪定諸房
例冊以樞密院副承旨李綬管勾至九年秋畢上之

會要

次第大書

神宗朝除周革樞密院編脩官制曰樞密之府自祖宗
以來釋患持危應變之大計與夫將相議論之臣密謀
要策皆具在此而大書貿亂淆雜而無紀綱故擇能臣

使次第之

荆公
文集

樞庭備檢

王銍權樞密院編修纂集祖宗兵制書成上覽之稱善
命改京官賜名樞庭備檢

中興係
年錄

召問兵學

顧臨編脩樞密院經武要略神宗召問以兵學臨對兵
以仁義為本仁者愛人義者循理動靜之機安危所繫
也

國
史

名震天下

胡忠簡公銓紹興兩宮未歸母后春秋已高故與大臣

決策從權獨樞密院編脩官胡公銓上書數百言王倫
秦檜孫近願竿三人頭羈留敵使興問罪之師當是時
一胡編脩名震天下勇者服怯者奮下至武夫悍卒遐
方裔土莫不傳誦其書樂道其姓字爭願識面雖北人
亦因是知中國之不可輕扶立世教非聖世之伯夷耶

周平
園集

與聞國論

隆興間臺諫言黃文昌疏云編脩官雖專以編錄本院

時政記為職然既係樞密官屬亦得與都承檢詳到宰

執閣與聞國論

孝宗實錄

檢正

補新集省屬之後

歷代沿革檢正之職古無之宋熙寧三年詔中書五房

各置檢正二員在堂後官之上都檢正一員在五房

提點之上皆以士人為之

石林燕語

元豐五年官制行罷

檢正職務分歸中書舍人給事中左右司郎官

續會要

建炎三年都省言軍興以來天下多事欲差官二員

充中書門下省檢正諸房公事

一員檢正吏禮兵房一員檢正戶刑位

序在左右司上於都堂置直舍從之四年罷紹興二

年詔復置一員紹興三年

孝宗已即位未改元

詔尚書省吏房

兵房三省樞密院機速房尚書省刑房戶房工房三

省樞密院看詳賞功房尚書省禮房今左右司分房

書擬其中書門下諸房令檢正書擬

中興會要

乾道八年

詔都承檢正左右檢詳編脩每日通輪宿直

續會要

羣書要語國家即位以來百司紀綱日失其序詔令稽

金史卷一百一十五
卷二
壅吏姍不虔思得時髦之英任吾宰屬之職淳熙制爾為

宰士考校詳當所補滋多范鏜除都檢正制

古今事實

宜選士人

熙寧三年中書門下言奉旨議中書創置士人為屬官
伏以中書統治百官以佐天子政事而所置吏屬尚仍
舊制宜高選士人稍依先王設教置輔之意今欲置檢
正五房公事一人逐房各置檢正公事二人並以朝官

充或用京官若選人即為習學公事見宰相叅政如常
朝官之禮

書功過簿

孝宗朝臣寮言熙寧中創置檢正五房公事官一員每
房各置檢正二員書功過簿以核羣吏之失其程督之
嚴如此

執筆入記

神宗開天章閣對輔臣呈官制除目詔中書檢正官聞

王震江陵吳雍執筆入記聖語面授震左司員外郎使

自書時論榮之

九朝通略

進文嘉覽

鄧潤甫字溫伯為檢正中書戶房公事詔取所進文上嘉而覽之遷集賢校理直舍人院

博覽古今

沈括字存中博覽古今於書無所不通熙寧間除太子中允為檢正中書刑房公事

非所好官

劉忠肅公摯字莘老王荊公初秉政搜擇人才任以不
次元公絳數以公為言荊公一見遂器重焉擢為中書
檢正居月餘默默非所好會除御史欣然就職

以備侍從

初議中書置屬神宗以為必不能得第一等人才王安
石曰中書屬官須精擇可以備臺諫侍從者

中書備對

大觀中李夔奏元豐間神宗命檢正官畢仲衍纂集內
外事物綱目為中書備對以其官吏流品戶口錢穀之
數以知禮法文物軍兵名額之數以知刑罰赦宥之事
夫役之數小大精粗無乎不備

彌綸省閫

奚陟歷右司郎中彌綸省閫

轄諸司事

尚書省左右司郎中各一人左司郎中副左丞所轄諸

司事署錄目勘稽失知省內宿直之事若右司郎中闕則併行之左右司員外郎各一人掌付十有二司之事以舉正稽違省署符目都事監而受焉凡都省掌六司之綱紀與百僚之程式以正邦理以宣邦教

精簡得人

太宗朝劉洎言曰尚書萬機乃為政本比者綱維不舉並為勲親在位品非其任功勢相傾將救茲弊且宜精簡四員左右丞左右司郎中如並得人自然綱維一舉

亦當矯正趨競豈惟息其稽滯哉

唐書

掄選有序

吳王潛為左司郎中典選事時喪亂之後官失其守甲簿湮沒潛雍容款接坐客常滿隨才而接人人自以為得徐知誥相吳掄選有序潛之力也

九國志

分治省事

左司郎中右司郎中各一人正六品左司員外郎右司員外郎從六品掌受付六曹諸司出納之事而舉正其

稽失分治省事左司治吏戶禮奏鈔班簿房右司治兵
刑工案鈔房而開折制置御史催驅封樁知雜印房則

通治之

會要

詔贊省務

宣和六年左司王藩奏都司以彌綸省司為職事無不
預今宰相入省諸房文字填委次第具呈自朝至于日
中或昏暮僅絕其勢不暇一一檢閱細故而省吏徑稟
宰丞請筆以草檢令承

通知省政

中興初除傅崧為檢正制曰宰士止於中臺之屬不與聞命令之原故又置檢正以通知三省之政汝其槩過

差以裨國論程期會以檢吏奸

汪藻行狀

政事所出

紹興除陳夔檢正制曰檢正之制自我神祖二省政事所出

古今事文類聚遺集卷一

欽定四庫全書

子部

古今事文類聚遺集卷二

詳校官中書_臣沈

侍讀_臣孫球

總校官編修_臣王燕緒

校對官中書_臣王家賓

謄錄監生_臣徐錫福

欽定四庫全書

古今事文類聚遺集卷二

元 富大用 撰

省官部遺

總學士

歷代公革宋朝殿學士有觀文殿大學士資政殿大學士學士端明殿學士殿學士資望極峻無吏守無典掌出入侍從備顧問而已觀文殿大學士非曾為宰

相不除觀文殿學士資政殿大學士及學士並以寵
輔臣之去位者端明殿學士惟學士久次者始除

兩朝國史

志
近歲以現任執政為之

觀文殿大學士

歷代沿革宋朝觀文殿即舊日延恩殿也慶曆七年以
文明殿學士稱呼同真宗謚號乃改名紫宸殿後又
以紫宸殿非人臣所可稱呼乃以延恩殿更名觀文
殿

會要

皇祐元年詔置觀文殿大學士寵待舊相今後

須曾任宰相乃得除授時賈昌朝由使相右僕射觀

文殿大學士判尚書都省觀文殿置大學士自昌朝

始詔畧見
事實注三年詔班在觀文殿學士之前六尚書之

上會要自是嘗任宰相者出必為大學士熙寧中韓絳

宣撫陝西河東得罪罷守本官四年用明堂赦授觀

文殿學士宰相不為大學士自絳始

羣書要語惟茲祕殿之嚴歐陽修除
劉沆制書殿之職號為清

優賜龐
籍詔職清書殿

古今事實

寵待舊相

事見前
官制

榜以嘉名

皇祐間詔置觀文殿大學士略曰因延恩之別殿觀前代之祕文榜以嘉名置諸禁職且為訪道之所以延稽古之臣猶慮哲艾之姿嘗居臺宰之任或因均逸姑務親仁備經術之咨詢廣政機之延訪

觀文殿學士

歷代沿革觀文殿乃隋煬帝殿名宋朝觀文殿即舊延

恩殿初為文明殿學士

四朝國史

慶歷七年宋庠言文明

殿學士稱呼正同真宗謚號兼禁中無此殿額其學

士理自當罷乞擇見今正朝或祕殿以名學士易之

乃詔改為紫宸殿學士以參知政事丁度為之

會要

學士多以殿名為官稱丁遂稱曰丁紫宸

歸田錄

八年

御史何郯以為紫宸不可為官稱於是改延恩殿為

觀文殿

歐陽公云觀文乃隋煬帝殿名理宜避之蓋當時不知然則朝廷之上果不可以無學也

即殿名置學士

會要又呂氏家塾廣記云觀文殿學士位資政殿學士上蓋初置觀文殿

學士職時已有為大資政者故於上加此美職朝廷亦知不當以學士壓大學士但常有人充此二者故久而不能革正可因無人

為此二職時正闕之也

以丁度為之

東齊記事

自後非

曾任執政者弗除

續會要

熙寧中王韶以熙河功元豐

中王陶以宮僚雖未歷二府亦除是職蓋異恩也然

韶猶無端明殿龍圖學士云

續會要官制舊典

羣書要語升觀殿之華資

宗澤贈觀文殿學士誥詞

宜升殿幄之嚴

古今事實

集瑞祕庭

慶歷八年詔略曰惟延恩之寶殿乃集瑞之祕庭福況
所開深嚴莫二矧先正齊心之地資冲人覽古之懷仍
建闕之闕且為備問之榮宜以舊延恩殿為觀文兼
改紫宸殿學士為觀文殿學士

資政殿大學士

歷代沿革宋朝資政殿在龍圖閣之東序景德二年王
欽若罷叅政真宗特置資政殿學士以寵之在翰林

學士下

欽若不悅訴於上曰臣向自翰林學士拜叅知政事今無罪而罷班反在下是貶也真宗

特為置大學士以處之

十二月復以欽若為資政殿大學士班

在文明殿學士之下翰林學士承旨之上資政殿置

大學士皆自欽若始自龔公班翰林承旨上一時以

為殊寵祥符初內文簡公以前宰相再入為東宮留

守復加此職自是訖天聖末二十餘年不以除人明

道元年李文定公知河陽召還始再命之景祐四年

王沂公罷相復除三十年間除三人而皆前宰相也

宋宣獻公罷叅知政事仁宗眷之厚因加此職自與
公後非宰相而除者惟宣獻一人而已康定二年右
正言梁適請遵先朝故事定以員數於是詔大學士
置二員學士三員

古今事實

特授舊臣

舊制資政殿學士並以寵輔臣之去位者元豐中韓維
陳薦皆以東宮舊臣故特授焉

贈會祕閣

何敏中為資政殿大學士敏中赴上賜會于祕閣兩制與焉

資政殿學士

歷代沿革宋朝康定二年詔學士置三員會要餘見前大

資類也

羣書要語增秩秋曹楊億兼榮月殿代表進書殿之寵名頌

真宮之優秩曲阜除祕殿宏開皇墳允集又曰著作禁

孫永制

林特異深嚴之選

楊億代表

祕殿隆名

藥城除李易制

兼華祕殿

呂正

獻謝表

書殿崇儒之班

曲阜行蔡卞制

設別殿之職寵名儒之賢

端明殿學士

歷代沿革端明殿即西京正衙殿也

退朝錄

後唐天成元

年明宗即位之初四方書奏命樞密使安重誨進讀

惜於文義孔循獻議始置端明殿學士命馮道趙鳳

俱以翰林學士充班在翰林學士上後有轉改止於

翰林學士內選任初如三館例職在官下趙鳳轉侍

郎諷任園特移職在官上後遂為故事晉天福五年

廢開運元年復

五代史

宋朝太宗時程侍郎羽為之後

隨殿名改為文明殿學士慶曆中改文明為紫宸後

改紫宸為觀文

其改置本末見觀文殿學士門

明道二年改承明殿

為端明殿復置端明殿學士以翰林侍讀學士宋綬

為之在翰林學士之下自明道訖元豐無前執政為

之者近來以待學士之久次者元豐中以前執政為

之自曾孝寬始

孝寬前為簽書樞密院

以見任執政為之自王

安禮始

安禮自尚書左丞為之知江寧並見續會要

政和中嘗改為延康

殿

職

建炎二年都省言延寧殿學士舊係端明殿學

士詔依舊

中興會要

近拜簽樞者多領焉

犀書要語擢自王堂升於紫殿常親顧問每預論思位

既並於深嚴禮合加於優異

馮道趙鳳制

方獎拔於名儒特

增新於近職俾叅顧問益廣謀猷

明道詔

以殿名命官本

緣麟趾之舊

東坡謝表

端明之職蓋自五代時通班右府侍

立殿中專以備顧問寵儒臣者也

古今事實

拜相復謝

後唐長興四年劉昫新入相中謝是日大祠明宗不御中興殿而坐於端明殿昫至中興殿門閣門使曰舊禮宰相謝恩須於正殿通喚請俟來日趙延壽曰命相之制下已三日中謝豈宜後時即奏聞昫遂中謝於端明殿昫昫自端明殿學士拜相復謝於本殿人士榮之

學士兩人

天下儒生僅餘萬數殿前學士只有兩人

特拜程王

端明殿學士國朝尤多以翰林學士兼之其不以翰林兼職及換職者百年間特拜纔兩人程戡王素是也

首建儲議

范蜀公鎮韓維上言公在仁宗朝首開建儲之議其後大臣繼有論奏追錄其言存沒皆推恩而鎮未嘗以語人悉以公十九疏上之拜端明殿學士

祕殿之職

英宗四年忽召王珪至藥珠殿專詔令兼端明殿學士
錫之盤龍金盃諭之曰祕殿之職非直器卿于翰墨間
二府缺員即出命矣

西班牙學士

宣和三年詔西班牙學士待制員多令中書省具名取旨
以班圖觀之學士待制班在西故曰西班牙

極天下選

劉忠肅公摯上言曰待制學士以侍從顧問為職自祖宗以來極天下之選不為定員今不考治行不察流品幸而給諫以上則計日而得之乞依元豐官制施行王岩叟亦進十不可之說朝廷不以為然

總待制

歷代沿革唐永徽中命弘文館學士二人日待制于武德殿西門文明元年詔京官五品以上清官日一人待制于章善明福門先天末又命朝集使六品以上

二人隨仗待制永泰時勲臣罷節制無職事皆待制
于集賢門凡十三人崔祐甫為相建議文官一品以
上更直待制其後著令正待制官日二人

唐職
林

永泰

元年敕裴冕等並集賢待制此始有待制之所然則
蓋唐設官也宋朝景德元年置龍圖閣待制以杜鎬
戚綸充並依舊充職祥符二年詔班視知制誥列其
下元祐令從四品掌侍從備顧問有所獻納則請到

或奏封

續會
要

羣書要語延英待制創自先天

晏類要

朕選通經術有行

義之士也訪對制閣參掌祕圖置在內朝之聯本惟儒

者之職

胡文恭行張昇
充天章閣待制

古今事實

以寵勲臣

唐代宗永泰中勲臣罷節制無職事乃令待制於禁門

書院間以文儒公卿寵之

唐書

以備顧問

德宗建中初自文官六品以上清望官每日二人更置待制以備顧問仍以延英南藥院故地為辭

古今文集

雜著

謝除待制侍講修撰實錄表 朱元晦

臣熹言伏奉告命授臣煥章閣待制侍講又準差兼實錄院同修撰者分聞南州愧蔑一毫之補論經內閣恍驚二命之頒畀史職以仍兼戴上恩而愈重藏逃莫避

跼蹐靡容

中謝

竊以王求多聞是惟建事帝入西學于以

上賢當始初清明之朝資朝夕論思之助作於心而關
政事必救其原脩其身以及國家要知所本非精誠之
有格何論說之足云視孟軻之敬王始不負聖人之學
為張禹之持祿殆將貽天下之憂况薦紳之所難又載
筆之為重頤頭白汗青之可誚豈槁頂黃馘之能為念
昔先臣嘗掌茲事正熙寧元豐之殺舛嚴於朱墨之分
辨元祐紹聖之譏誣炳若丹青之著苟無家業曷踐世

官憤而居之吁亦危矣伏念臣見聞本狹才識非長開
七袞之殘年荷二朝之異眷頃叨崇政之選嘗獲遂於
終辭茲玷邇英之聯覲莫後於素守此蓋伏遇皇帝陛
下言稽往訓動法成謨以緝熙光明之美而佛時仔肩
以剛健篤實之資而日新其德念遺大投艱之託推好
善忘勢之勤借是孤蹤聿來多士誦魯論一簞之義敢
竊企於師傳誦楚史八索之文庶無忘於規益

龍圖閣

學士
待制
直學士

歷代沿革龍圖閣宋朝大中祥符中建龍圖閣在會慶

殿西偏北連禁中閣東曰資政殿西曰述古殿閣上

以奉太宗御書御製文集及典籍圖書寶瑞之物

會要

及宗正寺所進屬籍世譜

四朝志

有學士直學士待制

直閣學士大中祥符三年置以杜鎬為之班在樞密

直學士之上六年詔結銜在本官之上

會要

直學士景

德四年置以杜鎬為之班在樞密直學士之下祥符

六年詔結銜在本官之上

會要

待制景德元年置以杜

鎬戚綸為之並依舊充職四年詔班在知制誥之下

並赴內殿起居

會要

自改官制為學士初復之職或知

制誥平出除之

官制舊典

羣書要語用進祕圖之拜

胡文恭行歐陽修制

中禁寶儲上應奎

壁之象先朝謨訓遠同河洛之符

東坡謝表

內閣深嚴

同淵

圖祕職

蔡襄行歐陽公制

仍進義圖之序

賜鄭溫伯辭龍圖學士詔

河圖遂

在西清朝位冠於五閣

初寮除龐寅助制

延閣祕藏學士貴班

淇水除李承之制

河圖寵名增峻班列

曲阜行李南仲詔

河圖美職

曲阜

龍圖待制

徐鐸制

改河圖之近綴

同上除錢待制

河圖廣內之職

曲阜除傳

克俞制

延閣侍從之職

行張商英制

內閣應對之職

行王觀制

詩句羣玉天中開策府神龜溫洛薦圖書

楊億龍圖閣觀御書

冊

府藏書在紫微退朝稽古助論思

楊億

龍閣便為黃閣老

周益公賀胡邦衡除龍圖學士

古今事實

龍闕三點

蔣樞密之奇為淮漕求字於徐守信徐書龍字而闕三

點蔣曰何書之不全也曰他日當為足此是歲奏對稱
旨除龍圖閣直學士及回持前字見徐徐索筆為作三
龍未幾遂進老龍

一言而拜

孔道輔論廢后事天下聳聞其風采近臣獻詩千首執
政請以為龍圖學士上曰千首詩豈如孔道輔一言拜
龍圖閣

龍圖老子

范文正公仲淹以龍圖直學士帥邠延涇慶四路威德
著聞夷夏竦服熟戶蕃部率稱曰龍圖老子至於元昊
亦以此呼之

學士奉祠

淳熙中林安宅以學士奉祠

古今文集

雜著

謝龍圖閣學士表

蘓子瞻

中禁寶儲上應奎壁之象先朝謨訓遠同河洛之符隸

職其間省躬非擬

中謝

伏念臣學非有得愚至不移雖叨

過實之名卒無適用之器少時妄意蓋嘗有志於事功

晚歲積憂但欲歸安於田畝屬聖神之履運荷識拔之

非常猶冀桑榆之收遽迫犬馬之疾力求閒散庶免顛

躋豈謂皇帝陛下聖度包荒天慈委照察其才有所短

不欲強置之禁嚴知其進不由人故特保全其終始遂

加此職以責其行臣敢不仰緣末光益勵素守徃何之

而不可中無愧之為安但未死亡必期報塞

代陸侍郎謝龍圖閣直學士表

汪藻

鋒車趣召記甘泉法從之餘芝檢疏榮陞延閣清班之
首恩光曲被感涕交流

謝中

伏念臣頃以疾辭安於外補

剖符方面兩膺南國之除持橐禁嚴四玷西清之選自
守枌榆之壤屢驚蒲柳之秋身留閭徼之山川夢寄長
安之鐘鼓所憂餘日莫陪鳴玉之班何意中天忽降賜
環之命奔馳上道展轉逾時曾未對於清閒已亟蒙於

褒馭錫之華秩寵以神毫豈伊蹠蹠之微蹤堪此便蕃
之異數茲蓋伏遇皇帝陛下天臨萬物子視羣臣憐孤
生去國之七年抱衰疾守藩於萬里靡因人譽名季布
於江東因受帝釐見賈生於宣室特假河圖之峻用為
州綬之榮豈惟示眷於始終蓋欲均勞於中外臣敢不
益堅晚節無愧初心雖宿疾未除難以筋骸之勉強然
大恩必報誓於肝膽之靡捐也

律詩

觀文忠公六一圖書

陳後山

先朝羣王殿冠佩環羣公神文煥王度喜色見天容御
榻誰復登帝書元自公緬懷弁服士酬獻鳴琤琮

天章閣

學士待制

直學士

歷代沿革宋朝天禧四年初建天章閣在會慶殿之西
龍圖閣之北明年仁宗即位修天章閣工畢奏真宗
御製安於天章閣東曰羣王殿西曰藥珠殿北曰壽
昌殿南曰延康殿內以桃花文石為流杯之所以在

位受天書祥符改曰天章取為章于天之義天聖八

年置待制慶歷七年又置學士直學士

會要周益公宏詞編題

又有侍講學士慶歷七年初置在龍圖閣學士之下

學士罕以命人迄仁宗世纔王摯一人

官制舊典云天章閣只除

待制不除學士難稱呼也

直學士慶歷七年初置天章閣直學士

在龍圖閣直學士之下

會要

待制天聖八年初置寓直

於祕閣與龍圖通宿尋命范諷鞠詠充職

職官分紀

犀書要語進職西序

曲阜行黃履天章閣待制

進聯內閣

王岐公除許亢制

延對禁途

王岐公除
張友直制

延閣侍從之遽

曲阜行范紳禮
復天章閣待制

萃

帝文於寶締以待碩儒

王岐公除
張友直制

詩句我我天中閣鳴王改新步

王荊公送元
待制知福州

古今事實

玉府藏書

宋朝慶歷七年置龍圖閣學士詔曰欽惟聖考濬發宸文
百篇森布於寶函三襲肇興於華閣肆予纂紹之始務
闡師儒之隆遂延勸講之臣欽佇論思之益掩玉府藏

書之盛延金門待詔之才宜令廣待從之員抑亦副通追之念特置天章閣學士直學士也

金門待詔

事見上

天章之號

天聖八年置天章閣待制詔曰真宗皇帝躬上哲之資據大寧之會受帝媯之瑞籙發谷口之璿源勒銘喬封奠玉方澤炬赫景炎丕隆寶構凡經禮樂之制續成辰象之篇愛即禁途肇新層閣榜以天章之號煥乎策府

之華宜擇雅才俾叅近署可特置天章閣待制位龍圖閣待制之下

古今文集

雜著

謝轉禮部員外郎充天章閣待制表

韓琦

渙渥自天震惶無地改中臺之華序進內閣之清班盡出高明殊登祕近竊念臣發自顏巷賓于舜門一第為

榮四方無效爰自書林預選桂籍升華耻汨沒以懷安
或感激而論事惟慕古人之節詎希英主之知伏惟尊
號皇帝陛下稟帝堯之聰明加漢高之豁達坦聖懷而
虛受期鴻化以感孚念三聖之艱難而成丕業求士人
之蹇諤以補大猷臣猶愧非才首當清問危言多犯孤
立自持斧鉞居前雷霆在上敢避樞機之禍終乖藥石
之良陛下日月垂光江海敷量恕其萬死假之一麾望
已絕於青雲咎未更於鴻霈俄易藩宣之寄寧分旰昃

之憂忽降綸章荐加寵數而况闢圖書之府叨處於深
嚴踐雲龍之庭當備于顧問非名儒而不稱豈曲士之
能堪矧造清曹仍居舊治輝榮大集志願何求敢不內
守朴忠外修景行進退惟道遵聖賢視履之方始終一
心副君父育材之造

寶文閣

學士
待制

直學士

歷代沿革宋朝寶文閣在天章閣之東西序羣玉璫珠
殿之北即舊日壽昌閣慶歷改曰寶文嘉祐八年英

宗即位詔以仁宗御書御集藏于寶文閣

命王珪撰記立名

治平四年神宗即位始置學士直學士待制恩賜依

龍圖英宗御書附于閣

會要宏詞編題

學士治平四年初置

以呂公著兼直學士治平四年初置以邵必為之

會要

職畧待制治平四年初置

羣書要語鈿軸寶函未終繙綠白雲紫氣遽遂上賓

治平

除學士詔

大訓九歌之重垂世其長廣內秘室之藏詒謀無

極同上西清近班

曲阜呂嘉問制

奎文寶訓入直禁嚴

東坡集

寶奎

之直

牋表類

延閣禁途

曲阜制

延閣近職

范純粹制

通籍延閣

除王

欽若制

延閣待從之班

曲阜李之純制

三聖圖書萃在延閣儒學

之士列職其中諷議討論維待妙選

古今事實

藏書之府

治平四年置寶文閣詔曰昔我宗祖咸有制作煥于簡編河漢昭回奎壁相映乃規層宇遂在西清憲上帝藏書之府彰累朝稽古之盛並揭嘉名以登峻望俾服凝

嚴之職因為咨訪之地寶文閣宜置學士直學士待制
夢草學士制

治平三年予為知制誥夏六月夢丞相遣朱衣吏召命
草某人為邃清殿學士制明年五月丞相遣朱衣吏召
當制舍人呂縉叔除卻不疑為寶文閣學士後數日得
承旨張公所作詔云乃規層構邃在西清記去歲之夢
與詔文相合若符契焉

春明退
朝錄

魁甲寶文

章衡知澶州神宗曰卿為仁宗朝魁甲寶文藏御集之處未始除人今處卿

古今文集

雜著

辭免直寶文閣狀

朱元晦

熹昨以妄庸薦叨除用辟言引疾曲荷俯從省己顧私不勝感激所有宮觀差遣熹已即時望闕謝恩祇受訖惟是進職恩命眷獎隆深自顧么微莫堪稱塞無覩近

制內閣清班非有勲庸不輕遷授而熹無狀行不掩言
無以取信交遊以至自貽詬辱既勤聖慮復厠朝綱罪
則已多功於何有醜顏冒受義實難安欲望朝廷特賜
敷奏追寢成命令熹且以舊官竊食祠館不勝榮幸伏
候指揮

顯謨閣

學士
待制

直學士

歷代沿革國朝元符元年曾布鄧洵仁各申請建閣詔
翰林學士中書舍人撰閣名五以聞續建閣藏神宗

御集以顯謨為名

神宗大新政事故以
丕顯文王謨為名

徽宗建中靖

國元年詔以顯謨閣為熙明閣仍置學士直學士待

制續奉旨仍以顯謨為額

此據周益公宏詞編題而
續會要云復顯謨舊名年

月無考按次年已詔顯謨閣學士直學
士如三閣故事復名顯謨恐在此年

崇寧元年詔

顯謨閣學士直學士待制如三閣故事序位在寶文

閣學士直學士待制之下學士直學士待制並建中

靖國元年置

古今事實

藏金玉之編

建中靖國元年詔略曰神宗皇帝言則為文昭如雲漢
寶之垂世炳若丹青仙馭升遐泰陵繼序乃眷祖宗之
舊悉藏金玉之編邃在西清並崇華宇爰咨邇列俾訪
遺文鈿軸未終雲輶忽遠肆冲人之纂紹惟往憲之欽
承用揭嘉名乃延俊望詒謀有翼豈徒琬琰之並陳與
天無窮是推奎壁之相照宜以顯謨為熙明

圖功臣之像

三年又詔以熙寧元豐功臣圖形於顯謨閣詔略曰神宗御集總九千八百餘篇藏于禁閣揭以顯謨所以丕昭聖作也維時功臣宜列于此其熙寧元豐功臣圖形於顯謨閣

徽猷閣

學士待制

直學士

歷代沿革宋朝大觀二年初建徽猷閣以藏哲宗御集

置學士直學士待制

會要

羣書要語峻西清之秩

龍溪除詹又制

顧己班於次對且就進

於榮名

初寮除徐鑄制
自待制升學士

徽閣西清之崇資

吳芾制

次對西

清實聯榮於法從

初寮除陳
彥修制

升甘泉法從之班

龍溪除
胡舜陟

制

古今事實

寶藏之所

大觀初置學士等官詔略曰祖宗述作皆有寶藏之所
叅列廣內揭為嘉名世擇儒臣以資訪納今將祗率成
憲名以出信不可無所考也在詩有之君子有徽猷是

惟詢德之美而觀道之成其哲宗御集建閣以徽猷為
名

敷文閣

歷代沿革宋朝紹興十年置實錄院檢討朱翌申請乞
建閣以藏徽宗聖製詔閣以敷文為名置閣學士直

學士待制等官

中興
會要

羣書要語內閣寶儲學士最為高選

吳希解免
直學士狀

進奎文

之直 延閣之華班聯愈峻

並同上

古今事實

宸章奎畫

紹興間置學士官詔略曰徽宗宸章奎畫煥乎若三辰
之文麗天垂光賁飾羣物殆與詩書相表裏崇建層閣
以嚴寶藏恭以敷文為名宜置學士直學士待制直閣
以次列職備西清之咨訪為儒學之華寵其著于令

煥章閣

學士
待制 直學士

歷代沿革宋朝淳熙間建藏高宗御製學士直學士待

制並淳熙十五年置

待制初除
劉國瑞

古今事實

堯章邃閣

淳熙建煥章閣置學士等官詔略曰載稽帝世之隆無
若堯章之煥因揭名於層宇仍列職於清廟又淳熙批
荅云堯章邃閣

華文閣

學士
待制

直學士

歷代沿革宋朝慶元二年置藏孝宗御製學士直學士

待制並慶元二年詔置

羣書要語陞嫺閣之宰班

慶元
批荅

華閣增學士之寵

同上

古今事實

羣玉之府

慶元二年置華文閣學士等官詔曰朕惟孝宗皇帝睿
闡皇圖粹昭王度經緯天地道存灝噩之書鼓舞風雷
仁盪溫純之命寫之琬琰炳若丹青太微三光之庭丕
闡鳳巢之勢上帝羣玉之府遽通龍紀之聯寶典謨訓

誥之垂敝禮樂刑政之用華協克章之煥文光聖哲之
明典輯鴻徽禮嚴燕翼以華文為名置學士直學士待
制直閣式遵刑獻寵陟儒英庸飾攸司其刊諸令

古今文集

雜著

除將作監直華文閣謝表

劉克莊

山川秀出太極生於兩儀雲漢昭回垂光飾於萬物次
對有列非賢不居如臣者少而才疎老以疾去逢聖明

之求舊亟號召以拔淹顧以有采薪之憂遂違不俟駕
之禮逃刑已幸即拜更優以歸守東岡之陂扁舟載月
忽夢入西清之序榮光屬天茲蓋伏遇皇帝陛下聖孝
通神仁厚詡物念吾父有所愛之犬而況於人謂微臣
如遺野之蛇未旌其隱曾是元正之朝士得見會昌之
新春告厥臣工昭其德意臣敢不吉蠲若厲顯相必齋
仰瞻圭璧之芒寒俯嚴香火之尊奉弱水三萬恍親銀
闕之雲大椿八千祝為黃屋之壽臣無任感天荷聖激

切屏營之至

寶謨閣

學士
待制

直學士

歷代沿革宋朝嘉泰二年八月置以藏光宗御製學士
直學士待制並嘉泰二年置

古今文集

雜著

謝除寶謨閣學士表

楊廷秀

聖謨新閣森天上之寶書法從崇班綴西清之學士墮

雲霄之異數貢山澗之遠臣戴恩不貲圖報無所臣

謝

恭以光皇之立極煥乎丕訓之詒謀曰都曰俞禹無間
矣有典有則宗其興乎屹璇題之造天乾坤闔闢藏金
匱而鏤玉雲漢昭回盍簡英奇以司文獻如臣者學焉
將落老矣無能分甘痼疾於煙霞敢夢末光於日月楓
林楚水久違長樂之鐘聲銀闕金宮忽近瀛洲之雲氣
茲蓋伏遇皇上陛下慕親如舜對食見堯謂臣在昭考
之廷常陪鴻鵠之羽翼俾臣聯柱史之職盡護龜龍之

圖書而臣歷事四朝蔑聞寸效愧彼十八仙之盛以文
辭鳴惟茲三萬歲之呼使聖人壽

謝除寶謨閣學士表

楊廷秀

績無可考進所職以為真禮過乎優更於家而即拜民
之多幸人謂斯何臣某

中謝

竊惟學士之名首出從班之

右非星辰聽履舊入長於六卿則雲漢為章以代言於
兩禁望實具羨朝野乃孚如臣者少也慙愚老而災疾
六十六而解組夢隔日邊七十四而掛冠蹟荒雲外夫

何下澤之叟遽躡登瀛之仙花底玉堂月伴桃源之棹
雲間銀闕風恬蓬渚之舟覆載無私豚魚其信茲蓋伏
遇皇帝陛下天仁老老聖澤淵淵文獵渭濱上誤熊羆
之兆漢招商嶺何裨鴻鵠之歌祇辱詳延不稱明詔臣
被恩汪濊次骨榮懷擬周易八八卦辭俯慙家學同天
皇九九萬歲仰祝帝齡臣無任感天荷聖激切屏營之
至

寶章閣

學士
待制

直學士

歷代沿革宋朝寶慶二年詔置藏寧宗御製學士直學
士待制並寶慶二年置

古今文集

雜著

除寶章閣直學士知寧國府到任謝表

吳永叔

罷直禁林叨陞媯閣雖離扈從亦忝藩宣祇荷恩華彌
深感涕竊惟寧國本鳩茲地跨鵲岸營厥土硤瘠而堅

厥民精勁而藝唐時戶口不滿六萬戍兵纔及二千而西平淮夷北取澤潞守圉扞敵各廸有功今生齒之版幾倍於前而廂禁之籍乃不如昔若使歲年豐稔猶或可以保民脫遭水旱凶荒則將何以為國而況密邇姑孰接連大江當此防秋之時寧無飲馬之慮永言牧御宜籍英賢如臣之迂豈堪此寄伏念臣始自入仕至於升朝宰巖邑幾四年蓋嘗學道丞外府閱三載曾靡求知不自意於遭逢乃徧更於華顯既叨銓部憲曹之選

又忝詞垣翰苑之臣以文字為官常以語言為職業入
侍則閉閣草制吏責不加退朝則杜門讀書職憂靡及
向嘗登對便殿親聞王音謂臣奏疏頗為憂時謂臣麻
詞最為得體所以感激恩遇竭殫疲篤抑不思名既盛
則毀日來官愈清則忌益衆致煩吏議有累聖知不謂
特蒙皇帝陛下克仁如天漢德如海察其初無闕

其粗有小能寧屈刑章復紆郡綏霽威而待楊億既寬
陽翟之誅違謗而用元之猶畀黃岡之守臣無斯學力

有此寵榮荷遺簪之未忘誓結草以圖報故纔抵郡境
延見吏民具言天子聖神朝廷清泰治政無大小必躬
必親視民無戚疏無愛兼養有隱畢達無幽不伸更遣
近臣出為刺史凡白袍烏帽之叟見紫筆朱衣之人自
謂生長至今已八十餘歲不聞侍從出守幾三十餘年
以臣之來必慰其望臣敢不飭己以正臨民以莊不事
培植為聲名不崇簡大為風采官暇則勞耕夫于野農
隙則閱弩手于州千里佩符雖對斗壘旌旗之色五更

聽漏尚思神京鐘鼓之音

除寶章閣學士知溫州謝表 吳永叔

代耕南畝已玷廩人繼粟之恩假守東甌復霑學士登瀛之選殊私難報危涕自零伏念臣本自諸生家承素業柳氏之族少為朝士曩嘗聯綴於周行子雲之官不遇侍郎今已徑登於常伯豈薄技出宗盟之右而謏聞超往哲之先實以遭值聖明踐更華顯曾一麾而去國尋再命而典州雖回顧玉堂班莫陪於供奉而載瞻寶

古今事文類聚遺集卷二